

Minister Mike de Meza sumamente orguyoso cu e evento di SNAP

Si tur bario na Aruba organiza algo asina lo por yega bek na e comunidad uni di antes



MINISTER Mike de Meza presente na e evento di SNAP (San Nicolas Awareness Project) na San Nicolas a bisa cu pe ta un honor di mira ciudadanonan di San Nicolas mes lanta para pa organiza diferente actividad pa yuda den e SNAP.

E ta bisa cu esaki ta algo cu nan a papia di dje hopi aña caba caminda cu a veza e momento

cu nan mes na San Nicolas tin cu lanta para, cu no por warda solamente riba otronan pa haci algo pa nan na San Nicolas. “Nos no por warda solamente riba Gobierno pa haci algo pa San Nicolas, nos mes di San Nicolas tin cu lanta para y bisa ‘ban wak con nos por motiva nos hobenan, nos grandinan, muchanan chikito, hacinan aware di nan

bario’, paso no ta un famia so e ta tuma pa cria un mucha, pero henter un bario, henter un comunidad”. Asina Minister de Meza a agrega cu si por enfoca riba esaki, si por haci tur hende conciente di esey, e ta algo grandi.

E ta sigui bisa cu si mira awendia con criminalidad ta azotando nos pueblo, con nos rumannan,



amigonan, primonan ta cay den droga, e problema di e situacion di e adictonan, e ta un situacion tristo y dor di esey Mike de Meza ta sinti su mes orguyoso y honra di a wordo invita na e actividad aki. E ta di opinion cu si tur bario na Aruba haci un actividad asina, lo por yega bek na un comunidad manera esun cu nos a conoce ora nos tabata chikito, 40 aña of mas pasa caminda tur bisiña tabata cu otro, tur tabata conversa bon caminda e tabata manera un famia grandi caminda cu si tin un problema tur hende ta yuda otro. Continuando Minister de Meza

a bisa cu e actividad aki ta algo hopi great, caminda cu ta dedica un dia den aña caminda ta bisa cu e dia ey tur hende den comunidad di San Nicolas y vecindario por pone cabesnan hunto pa refleha con cos ta bayendo den nan comunidad, kico nan mester haci, muestra ehempel di con tin cu traha hunto, con por haci pa drecha e bida social, socio-economico, e bida religioso, e bida den nan mesun ciudad sin punta dede riba otro, con nan mes por haci e vecindario limpi, con nan mes por drecha e relacionnan entre ciudadanonan, entre otro.